

Հերաս հանդարտագոյն հնչէ յերկնամիջակ
կիտին, և Հեփեստոս ոչ զաւրանա ի Ժամա-
դիտակին յաւէտ: Սակս որո սերմանեալքն
ի նմա բիւրապատիկ արդիւնանան. և ճարա-
կեալ խաշանց և անդէոց և գիրացեալ ստուա-
րանան. զի որ բուծցէ անդ երինջ մի յար-
ջառոց կամ մաքիս երկուս, ըստ տեսանողին
բանի, ի յորդովթենէ կըթին կերիցէ իւզ. զի
իւզ և մեղր կերիցեն ամենայն բնակեալքն
ի նմա:

Եւ լերինք լի են եղջերուաւք, և վեմքն
նապաստակաւք, և ընդ մէջ նորա գնան ջուրք.
յոլով են ծառք և մայրք ձագասնունդ թռչը-
նոց՝ և բոյնք տառեղանց՝ ապաւէն նոցա: Այլ
և համահաւասարէ Ադենա, զրաստին Արա-
մազդա՝ և դաշտին Ելեսինա: Զանգի վայր է
փափկութեան ըստ աւրինադրին երգոյ. և
ի սմանէ բըղխէն երկու ակունք Տիգրիս և
Մփրատէս, որպէս Յորդ և Դան՝ ի Սանիրա և
յԱհերմոնէ. և յառաջ խաղալով՝ աւձաձե
զալարմամբ, վէտ ի վէտ և պատ ի պատ [Թդ.
10բ] ճաւճին ճեմին ծիծաղին ծաւալին պա-
տառելով զլերինս և հատանելով զդաշտս. և
պար առեալ պատեն զԱսորիս, միաւորեալ ի
Տեսրոն. ծնանի արս զիւցազունս, քաջս և
կորովիս, մենամարտիկս անվանելիս, Հանէ
հաց սրտապինդ և զինի ուրախարար, ևս և